

GARIZUMA

HAUSTERRE EGUNA (B)

HASIERAKO OHIKUNEAK ETA HITZAREN LITURGIA

Damu otoitzik ez da egingo; horren ordeaz errautsa ipiniko da.

Otoitza

Indar gaitzazu, Jauna, zeure laguntzaz
Garizumaren hasiera honetan,
bihotz-berritzeari ekin diezaiozun,
penitentiaren bidez etsai gaiztoari gogor egiteko.
Zure Seme Jesu Kristo.

I. IRAKURGAIA: JI 2, 12-18

Urra itzazue bihotzak ez soinekoak.

Joel Profetaren liburutik

«Begira zer dioen Jaun guztiz ahaltsuak:
Itzul zaitezte Niregana bihotz-bihotzez,
baraez, negarrez eta saminez.
Urra itzazue bihotzak, ez soinekoak;
itzul zaitezte Jaunarengana;
zuen Jaungoikoarengana;
bihotz-bera eta errukitsua baita,
haserretzen zaila, erruki haundikoa,
eta bere zemaietaz damutzen dena.
Nork daki ez ote den itzuliko eta damutuko,
eta ez ote digun utziko oraindik
bedeinkapena eta eskaintza,
eta Jaunaren, gure Jainkoaren isur oparia?
Jo ezazue turuta Sionen, adierazi oihuka baraua,
dei egin batzarrera;
bildu herria, bedeinkatu batzarra, bildu zaharrak
eta ekarri gaztetxoak eta bularreko haurrak;
atera bedi senarra ezkongelatik,
emaztea ezkonohetik.
Sarrera eta aldare bitartean negar egin bezate
apaizek, Jaunaren zerbitzariak,
eta esan: “Barka, Jauna, barka zure herriari;
ez utzi lotsatan zure ondarea;
ez dezatela menperatu jentilek,
ez dezatela esan arrotzek:
Non dute, bada, beren Jaungoikoa?”

Sor bekio Jaunari bere lurraldearenganako errukia eta barka biezaio bere herriari».

ERANTZUN SALMOA: Sal 50, 3-4. 5-6ab. 12-13. 14 eta 17

R/. Erruki, Jauna, bekatu egin dugu eta.

Erruki zakizkit, Jainko, duzun maitasun haundiaz,
suntsi ezazu nire makurra zeure amaigabeko errukiaz.
Garbi nazazu zeharo neure hobenetik,
ikus nazazu neure gaiztakeriatik. R/.

Neure bihurrikeria ezagutzen baitut,
neure hobena beti begien aurrean baitut.
Zuri egin dizut bekatu, Zuri bakarrik,
zure begietan oker dena egin dut nik. R/.

Bihotz garbi bat, Jainko, sor ezazu niregan,
arnasa bizkorra berri ezazu nire barnean.
Ez nazazu urrun zeure aurretik,
zure arnasa santua ez kendu niri. R/.

Zeure salbamenaren poza bihur iezadazu,
zeure arnasa zabalez sendo nazazu.
Irekiko dizkidazu ezpainok, Jauna,
eta nire ahoak iragarriko du zure gorespena. R/.

II. IRAKURGAIA: 2 Ko 5, 20-6, 2

*Adiskidetu zaitzte Jaungoikoarekin:
oraintxe da garai egokia.*

San Paulo Apostoluak Korintotarrei

Senideok: Gu Kristoren ordezeko bezala ari gara, beraz; Jaungoikoak gure ahoz hotsegingo balizue bezala. Kristoren izenean esaten dizuegu: adiskidetu zaitzte Jaungoikoarekin. Bekaturik ezagutu ez zuen Hura, Jaungoikoak guregatik bekatu bihurtu zuen, guk Harekin bat eginda Jaungoikoaren salbamena irits dezagun.

Jaungoikoaren zerbitzari garenez gero eskatzen dizuet, ez dezazuela alferrik har Haren grazia. Berak baitio: «Garai egokian entzuten dizut; eta salbamen egunean laguntzen». Begira, beraz: oraintxe da garai egokia, orain salbamen eguna.

EBANJELIOA: Mt 6, 1-6. 16-18

Ebanjelio aurreko txatala: Ik. Sal 94, 8a 7b

V/. Gaur, ez gogortu zuen bihotza,
baizik eta entzun Jaunaren mintzoa.

Ezkutuan ikusten duen zure

Jesu Kristoren Ebanjelioa San Mateoren liburutik

Aldi hartan, Jesusek honela esan zien bere ikasleei: «Begira, gero, zuen egite onak gizakien aurrean egin, ikus zaitzaten! Bestela ez duzue zeruetan dagoen Aitaren saririk izango.

Limosna ematerakoan, beraz, ez ibili aurretik turuta jotzen, itxurazaleak sinagogetan eta kaleetan ibiltzen diren bezala, jendeak gorets ditzan. Egia esan, horiek jaso dute beren saria. Zuk, ordea, limosna ematerakoan, ez beza jakin zure ezkerak, eskuinak egiten duena; zure limosna hori ezkutuan geldi dadin; eta ezkutuan ikusten duen zure Aitak emango dizu saria.

Otoitz egiterakoan, ez egin itxurazaleek bezala; horiek sinagogetan eta enparantza ertzetan zutik otoitz egin-zale agertzen baitira, gizakien ikusgarri. Egia esan, horiek jaso dute beren saria. Zu, ordea, otoitz egiterakoan, sar zaitez zeure gelan, itxi atea, eta egiozu otoitz ezkutuan dagoen zeure Aitari; eta ezkutuan ikusten duen zure Aitak emango dizu saria.

Barau duzunean, ez ipini aurpegi ilunik, itxurazaleek bezala; aurpegia zatartu egiten baitute horrelakoek, baraurik daudela ingurukoei adierazi nahiz. Egia esan, horiek jaso dute beren saria. Zuk, ordea, barau duzunean, gantzutu zeure burua usain gozoz eta garbitu arpegia; ingurukoek ez, baino ezkutuan dagoen zure Aitak ikus dezan zure baraua; eta ezkutuan ikusten duen zure Aitak emango dizu saria».

ERRAUTSA BEDEINKATZEA ETA IPINTZEA

Homilia egin ondoren, apaizak, zutik eta eskuak bildurik dituela, esaten du:

Senideok: Egin diezaiogun otoitz Jainko Aitari, penitentziaren ezaugarri hartuko dugun hauts hau bere grazia ugariez bedeinka dezan.

Bedeinkapen otoitza

Jainko Jauna,
umiltasunak bigundu egiten zaitu eta damuak samurtu;
entzun gure otoitzak, eta isur bihotz onez
zure bedeinkapenaren + grazia
hautsa hartzera doazen zure zerbitzarien gainera:
Garizumako egintzak zintzo betez,
gogo-bihotzak garbiturik, irits daitezen
zure Semearen Pazko misterioak ospatzera.
Errege bizi baita gizaldi eta gizaldietan.
R/. Amen

EUKARISTIAREN LITURGIA

Oparigaien gainekoa

Garizuma hastean, opari hau eskaintzen dizugu, Jauna,
eta otoitz egiten:
maitasunezko egintzek eta gure penitentziek
lagun diezagutela geure buruaren jabe izaten,
geure bekatuetatik garbituta
bihotzez ospa dezagun zure Semearen nekaldia.
Errege bizi baita.

Prefazioa: Garizumakoa.

Jaunartze ondorengoa

Hartu dugun sakramentuak, Jauna,
zure gogoko egin ditzala gure barauak
eta guretzat osasungarri.
Jesu Kristo.